

TUSAGASSIUTINUT NALUNAARUT

Ullumi ulloq pingasunngorneq 15. december 2021 qilaatersornermut pingaaruteqarluinnartumik pisoqarfiuvoq. Tassami UNESCO-p ukiumoortumik Parisimi ataatsimiinnermini qilaatersorneq inngernerlu kulturikkut kingornussatut inuiassuit nalunaarsorsimaffiannut allattorsimasussatut aalajangerpaa. Inuiaqatigiit inuit kalaallilu, taavalu aamma qilaatersortartut inngertartullu sinnerlugit, Nunatta Katersugaasivianit Allagaateqarfianillu matumuuna oqaatigerusupparput tamanna nuannaarutigigaarlugulu tulluusimaarutigigatsigu.

UNESCO aalajangiinnermini ilaatigut allappoq ileqqumut piginnittuunissatut misigineq annertusarneqartussaasoq, nunaqqatigiiaallu akornanni soqutiginninnermik naggueqatigiittullu kulturikkut kingornussat allat eriagineqarnissaannut soqutiginninnermik pilersitsisussaasoq: "Nuna tamakkerlugu nalinginnaasumik Kalaallit Nunaata kulturikkut ileqqunut kingornussasianut eqqumanerulerneranik kinguneqartussaavoq pingaartillugulu piukkunnassusia ingerlatsiviit iluanni aallunneqarnerulertussaalluni. Nalunaarsukkanut ilanngunneqarnerani, nunat tamalaat akornanni, kulturinilu allani soorlu naggueqatigiit Inuit allat akornanni, qilaatersornerup inngernerullu imarisai kulturikkut kingornussatut uumassusillit eqqumaffigineqarnerulissapput. Ilanngunneqarnerani aamma nipilersornermik aallutaqartunut allanut suleqateqalernissaq annertusassavaa, soorlu makku iluanni jazz, rap aamma indie rock, tamakkulu aqutugalugit kulturikkut assigiinngiaassuseq allatullu pilersitsiortorneq siuarsarneqassapput".

Nunatta Katersugaasiviata Allagaateqarfiatalu 2011-imili qilaatersorneq eriagisassatut nalunaarsuutitsinnut ilanngupparput sulissutigalugulu kulturikkut kingornussatut inuiassuit nalunaarsorsimaffiannut ikkunneqarnissaa siunertaralugu. UNESCO-mut innersuussineq 2017-imi Danmarkip kulturministereqarfia aqutugalugu nassupparput, tassanilu inuiaqatigiit, suliffeqarfiit peqatigiiffiillu qilaatersornermik sammisallit, minnerunngitsumillu qilaatersortartut inngertartullu isumasioqqaarnissaat tunulequtarinissaallu pingaartissimallutigu.

Danmarkip naalagaaffia, tassa Danmarki, Savalimmiut taavalu Kalaallit Nunaat, pernarluni eriagisassanik tigussaannngitsunik nalunaarsuiffimmiititaqalerpoq. Tamanna ersinngitsup piunasaatut oqaatigisariaqarnerpoq, tassami ukioq manna 2021-i tassaavoq ukiut 300-it matuma siornatigut kristumiussutsip eqqunneqarneranit qilaatersornerup akiorneqarluni nunatta kitaani tammariartulerluni nungutinneqarnerata aallartiffia. Ileqqoq Avanersuarimi Tunumilu ingerlatiinnarneqarsimavoq. Ullumikkut nuannaarutissaraarput qilaatersorneq 1970-ikkunnit kitaani uummarissaqqinneqarluni ileqqutut uteriartuaarnera, ullumilu annertusiartuinnartumik atorneqalersimasoq.

UNESCO-p aalajangiinnerani oqaatsit atorneqartut tamakkiisut nittartakkatsinni uani atuarneqarsinnaapput: <https://nka.gl/>

UNESCO-mi suliarineqarnera paasissutissallu tamakkiisut uani takuneqarsinnaapput: <https://ich.unesco.org/en/8b-representative-list-01191>

Apequtissaqartunut attavigineqarsinnaavoq pisortaq Daniel Thorleifsen e-mailikkut: daniel@natmus.gl